

COMUNICATO n. 674 del 17/03/2026

Mendranzes linguistiches, contribuc per la scomenzadives 2026 e sostegn per l'informazion per lengaz de la mère

[Ladino] Col provediment aproà en vender 13 de mèrz da la Jonta provinzièla aldò de la proponeta del president Maurizio Fugatti, do che l'é stat tout su la deliberazion de spartijon de la quotes del fondo provinzièl per la popolazions de mendranza per l'an 2026, che dèsc l met de responder en dut e per dut a la domanes ruèdes ite, vegn ametù a ciapèr l contribut sie scomenzadives che l'é stat conscidrà de gran significat, che les se met dant de fèr cognoscer e valorisèr i lengac de mendranza te sia doura scritta e a ousc. Con n auter provediment, la Jonta à aproà te la medema sentèda ence l program per l'an en cors di intervenc per l'informazion per lengaz de la mère.

"L stravardament e la promoziòn di lengac de mendranza i raprejentea n valor emportant per noscia Autonomia. Tras l finanziament de la scomenzadives portèdes dant dai enc e da la scoles e tras l sostegn a l'informazion per lengaz de la mère volon sostegnir e engaisèr la doura de ladin, mòchen e zimber en particulèr anter la generaziòn joenes, col didèr la trasmiscion e col renforzèr la competenzes linguistiches scrites e a ousc de la comunanzes", sotrissea l president Fugatti.

I projec ametui a finanziament i domana de meter a la leta pech più che 72.000 euro. Anter chisc l'é i corsc de alfabetisazion de ladin, destinè al personal aministratif e dozent de la Scola Ladina de Fascia. L projet formatif l se ouc ence a la jent grana en generèl, per i ejames de zertament de la cognoscenza del lengaz e cultura ladina, dal livel A1 al C1. L'é stat ametù ence l projet "Summer club 2026" del Istitut culturèl mòchen, per i bec de la scola populèra, che l vel portèr inant la doura del lengaz mòchen tras laboratories e ativitèdes de delet via per d'istà. L program perveit diesc dis de atività, per doi setemènes, fora per l meis de aost del 2026, scontrèdes con esperc de plurilinguism e na vijita a n'autra comunità de mendranza. L'é caraterisà da na atenzion particulèra a la desvaliva realtèdes del mond de la scola l projet del IC Pergine 1 "La Val dei Mòcheni: noi e gli altri", che l perveit laboratories de lengaz e cultura, corsc, fradaes culturèles e na formazion specifica per i dozenc, estra che la struturazion de n percors CLIL per mòchen.

Ence co la scomenzadiva "Territorio, lingua e cultura", l IC Folgaria-Lavarone-Luserna l vel tor ite i studenc te desvaliva ativitèdes, per renforzèr l'identità e la doura del idiom zimber. La medema scola l'à portà dant n auter projet ametù a finanziament, che l revèrda l sostegn al insegnament del zimber per i scolees de la populèra, con vijites sul teritorie e n viac didatich te Fascia, enveze l Istitut Zimber/Kulturinstitut Lusérn l metarà en esser per l quarto an l diarie de scola per zimber e todesch, zis aprijià, che tol ite curc comics.

Per chel che revèrda l program di intervenc per l'informazion per lengaz de la mère, aldò del parer de obligh dat ju da la Conferenza de la Mendranzes te la sentèda dai 21 de jené e aldò de la spartijon de la quotes del fondo provinzièl per l stravardament de la popolazions de mendranza per l'an 2026, l'é stat destinà en dut, per chest an, 403.248,72 euro.

L sostegn revèrda scomenzadives che favoresc l sparpagnament di lengac minoritères, a cura di Istitut culturèl ladin, mòchen e zimber e del Comun General de Fascia. Anter chestes, la piates periodiches te per lengaz de la mère publichèdes sui foli locai, i notizières setemanèi, la trasmiscions radio e la produziòn per

I web e che va fora sun desvalives canai, i corsc de lengaz e tropa altra ativitèdes editorièles e de comunicazion che dèsc l met de smaorèr la perferida informativa, smaorèr l numer di utenc e miorèr la calità linguistica de l'informazion.

Traduzion di Servijes Linguistics e Culturèi del Comun general de Fascia

(cdt)